



## **UCAPAN**

**YANG BERHORMAT  
PEHIN UDANA KHATIB DATO PADUKA SERI SETIA  
USTAZ HAJI AWANG BADARUDDIN BIN PENGARAH  
DATO PADUKA AWANG HAJI OTHMAN  
*MENTERI HAL EHWAL UGAMA***

**DI MAJLIS SAMBUTAN MAULUD NABI MUHAMMAD SHALLALLAHU  
'ALAIHI WASALLAM PERINGKAT NEGARA  
BAGI TAHUN 1443 HIJRAH / 2021 MASIHI**

**PADA HARI SELASA, 12HB. RABI'UL AWAL 1443H BERSAMAAN  
19HB. OKTOBER 2021M**

**BERTEMPAT  
KEMENTERIAN HAL EHWAL UGAMA,  
NEGARA BRUNEI DARUSSALAM**

بِسْمِ اللَّهِ الرَّحْمَنِ الرَّحِيمِ

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى أَشْرَفِ الْأَئِمَّةِ وَالْمُرْسَلِينَ،  
سَيِّدِنَا مُحَمَّدٌ وَعَلَى أَلَّهِ وَصَحْبِهِ أَجْمَعِينَ.

السلام عليكم ورحمة الله وبركاته

*Para penonton yang dirahmati Allah sekalian –*

Bulan yang kita sebut bulan maulud iaitu pada hari dan pada bulannya 12hb Rabi'ul Awal tahun ini bertepatan dengan suasana kita senegara sedang berusaha mengekang jangkitan wabak COVID-19 gelombangnya yang kedua.

Bagaimanapun peristiwa bersejarah maulud iaitu kelahiran Nabi Muhammad Rasulullah *Shallallahu 'alaihi wasallam* tetap kita peringati.

Ia adalah komitmen kenegaraan yang sekaligus menjadi komitmen keugamaan kita umat Islam.

Ia komitmen kenegaraan kerana kita bernegarakan negara yang mendaulatkan ugama Islam menjadi ugama rasmi negara. Dan ia komitmen keugamaan pula ialah kerana kita menjadi penganut ugama Islam, mengimani 'aqidahnya, mengamalkan ajarannya.

Kedua-dua komitmen ini adalah tanda kita bersyukur kepada Allah *Subhanahu wa Ta'ala*.

Kita mensyukuri rahmat Allah *Subhanahu wa Ta'ala* kerana telah mengangkat dan mengutus Nabi Muhammad Rasulullah *Shallallahu 'alaihi wasallam* menjadi nabi dan rasul.

Kita mensyukuri Allah *Subhanahu wa Ta'ala* sekaligus mengenang jasa dan perjuangan Rasulullah *Shallallahu 'alaihi wasallam* mendakwah dan memperjuangkan Islam untuk kekal menjadi ugama anutan manusia sepanjang zaman dan kita adalah sebahagian umatnya.

Dengan itu setiap tahun kita peringati maulud kelahiran Nabi Muhammad, Rasulullah *Shallallahu 'alaihi wasallam*, junjungan kita sepanjang zaman itu dengan mengadakan acara-acara sambutan.

Adapun yang utama dan paling bersignifikan pada setiap tahun sambutan ialah titah perutusan Kebawah Duli Yang Maha Mulia Paduka Seri Baginda Sultan Haji

Hassanal Bolkiah Mu'izzaddin Waddaullah Ibni Al-Marhum Sultan Haji 'Omar Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam. Disiarkan keseluruh negara melalui Radio Televisyen Brunei pada sebelah malam menjelang 12hb Rabi'ul Awal hari maulud.

Kita dengan penuh takzim menyembahkan sembah junjung kasih atas perkenan baginda mengurniakan titah perutusan sempena sambutan maulud tahun ini. Kita juga mendoakan supaya Kebawah Duli Yang Maha Mulia dan Kerabat Diraja Baginda sentiasa dalam perlindungan Allah Subhanahu wa Ta'ala dengan rahmat sihat dan bahagia.

Titah Kebawah Duli Yang Maha Paduka Seri Baginda Sultan Dan Yang Di-Pertuan merupakan rangkaian titah-titah Baginda yang sentiasa memberi ilham. Ia memangkin semangat kita senegara dalam menghayati wawasan kepimpinan Baginda yang *meletakkan ugama Islam di hadapan menjadi pedoman, bukan di samping, dan pasti bukan di belakang*.

Seterusnya maulud juga ditandai dengan acara-acara sambutan di berbagai peringkat. Dan acara kita pada hari ini adalah sambutan peringkat negara. Kita menganjurkannya secara rakaman atau *virtual* yang disiarkan melalui rangkaian radio dan televisyen dan media sosial.

Sukacita disebutkan bahawa kejayaan majlis sambutan kita secara begini adalah berkat kerjasama erat di kalangan Ahli-Ahli Jawatankuasa Kerja terutama dari pihak Jabatan Radio dan Televisyen Brunei.

Usaha merakam semua perisian acara dengan gerak kerja dalam suasana COVID-19, kemudian menyunting dan mengadunnya menjadi sebuah program untuk siaran ini adalah hasil kreatif yang sangat kita hargai. Kita ucapkan tahniah dan terima kasih dengan irungan do'a *jazaakumullah khairan katsiran, 'ajilan au aajilan*.


Terima kasih penghargaan dan tahniah dengan irungan do'a yang sama juga kita sampaikan kepada semua pihak orang ramai, khasnya pimpinan masjid, surau dan balai-balai ibadat beserta jawatankuasa takmir dan jama'ah masing-masing, juga kepada kumpulan-kumpulan belia. Mereka mengekalkan tradisi memeriahkan malam maulud dengan *Dikir Syarafil Anam* secara maya dalam talian selama dua belas malam berturut-turut.

Kesemua ini adalah tanda kita menyambut maulud. Tanda mengenang dan menghargai jasa bakti serta mensyukuri kenabian dan kerasulan Nabi Muhammad Rasulullah *Shallallahu 'alaihi wasallam*, junjungan kita yang kita kasihi sepanjang zaman.

Kita mengasihi Rasulullah *Shallallahu 'alaihi wasallam* itu terutama mengenangkan sosok kemanusiaannya terserlah dalam sosok kenabian dan kerasulannya seperti yang disebutkan oleh Allah *Subhanahu wa Ta'ala* dengan firman-Nya ayat 128 surah At-Taubah:

لَقَدْ جَاءَكُمْ رَسُولٌ مِّنْ أَنفُسِكُمْ عَزِيزٌ عَلَيْهِ مَا عَنِتُّمْ حَرِيصٌ عَلَيْكُمْ بِالْمُؤْمِنِينَ

رَءُوفٌ رَّحِيمٌ



### Tafsirnya:

Demi sesungguhnya telah datang kepada kamu seorang Rasul (*Nabi Muhammad Shallallahu 'alaihi wasallam*) daripada golongan kamu sendiri, yang sangat mengambil berat terhadap kesusahan yang kamu tanggung, yang menginginkan kebaikan kepada kamu, sangat belas kasihan lagi pengasih terhadap orang-orang beriman.

[Surah at-Taubah: 128]

Sedemikian itu Rasulullah *Shallallahu 'alaihi wasallam* dengan sosok kemanusiaannya dikasihi oleh Allah *Subhanahu wa Ta'ala* diangkat menjadi nabi dan diutus menjadi rasul, sangat prihatin serta menyantuni orang-orang beriman dengan penuh kasih sayang.

Maka itulah antara ciri utama kepimpinan Rasulullah *Shallallahu 'alaihi wasallam* dan itulah antara risalah atau mesej kenabian dan kerasulan Baginda *Shallallahu 'alaihi wasallam* yang kita ingin kongsikan dengan slogan kata tema sambutan: *Rasulullah Kekasih Allah, Kekasihku Dunia Akhirat*.

Sekian. Terima kasih.

وَبِاللَّهِ التَّوْفِيقُ وَالْهُدَى

وَالسَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ

- Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman,  
**Menteri Hal Ehwal Ugama.**

Daraina – 8 Spg 530 Sg Besar,  
KM 13 Jln Kota Batu, BD 2517, Brunei.  
Selasa, 5hb. Rabi'ul Awal 1443/12 Oktober 2021